

Gobierno kier yega na un sistema structural

Falta di inversion den mantencion lo costa mas cu un miyon extra pa Biblioteca Nacional

ORANJESTAD (AAN) — Den su calidad di Minister di enseñanza, bao di cual cartera Biblioteca Nacional ta cay, Minister Arthur Dowers a referi den conferencia semanal di prensa, na e evaluacion cu a wordo haci riba e problemanan di infraestructura den dicho instancia.

Pa loke ta concerni e situacion di airconan cu tin instala eyden, e mandatario a splica cu nan a bin constata cu nan ta parcialmente mal instala y esey ta crea cierto problemanan.

Pa tal motibo gobierno a laga haci un investigacion door di un persona independiente, y aunke e no tabata tin e rapport den su man, el a sinti cu ta bon pa informa prensa cu a ser constata cu tin hopi fayoden e sistema aki.

No solamente cu parcialmente e airconan ta mal instala pero tin partinan

cu no ta instala mes. E mal instalacion ta haci cu e airco ta fria den e plafond di e biblioteca na luga di friapaden di e edificio.

E ta un situacion cu no a wordo ataca na un forma mas profesional, y gobierno ta na e momentonan aki evaluando con ta bay atende cu esnan cu a haci e trabao y si nan mes ta bay dreche, y si esey no ta posible lo percura pa expertonan di pafu bin pone e airconan funciona na un forma optimal.

E dignatario ta haya lamentable cu akinan tambe, diferente hende cu mester a carga responsabilidad no a hacie na e manera mehor posible, y e rapport cu a ser traha ultimamente ta duna cierto caminda di cana pa yega na e final di e solucion, unda cu e airco lo por funciona bon, si no tin hopi daño causa na dje, door di e mal instalacion.

Gobierno ademas, a evalua e

condicion di e dak y ayera mes nan tabata wardando riba un contesta definitivo di Biblioteca, mirando cu e forma con e dak ta traha ta haci tog, un tiki mas facil pa drecha e partinan cu ta lek. E prome conclusion cu tin ta cu probablemente e dak mester wordo cambia locual lo costa un suma extra di mas cu un miyon florin, y tambe nan ta reevaluando for di otro expertonan pa mira si esey ta e conclusion final. Y si esey ta e caso, mester busca e placa pa e trabao aki tambe. E dignatario a subraya cu ta hopi importante pa mira cu e placa aki mester bin for di un caminda, y si no logra esaki, lo no ta posible pa aumenta e presupuesto pero mester sake for di esun di enseñanza, di cual biblioteca ta forma parti di dje, y mester bay mira unda por acomoda e gasto aki.

E dignatario no a descarta e posibilidad cu si tin cu

cambia e dak completo, mester busca un localidad temporal pa Biblioteca Nacional, y e problema ta cu actualmente gobierno no ta dispone di un lugar adecua pa esaki.

Pero e no por yega na ningun conclusion te ora e rapport bin cla. Si ta asina cu tin espacio pa renovacion ainda, e ora ey e biblioteca por sigui funciona, mientras cu e trabaonan ta tumando lugar. Minister Dowers a remarca cu por mira cu pa falta di in-

version den mantenimiento di e proyectonan aki, gobierno ta haya su mes confronta na final cu gastonan sumamente grandi.

Pesey gobierno ta bay purba yega aworaki na un sistema unda cu por bay over na un forma di mantencion mas structural, pa preveni cu nan ta haya cada bez dilanti sorpresanan grandi unda tin cu paga miyones, pa por pone un departamento of un organizacion funciona na un manera optimal.